

Հավելված N1
ՀՀ վարչապետի N 446 - Ա
որոշման

Հ Ա Յ Ե Ց Ա Կ Ա Ր Գ
ՊԵՏԱԿԱՆ ԲՅՈՒՋԵՏԱՅԻՆ ԾՐԱԳՐԵՐԻ ԳՆԱՀԱՏՄԱՆ
ՀԱՄԱԿԱՐԳԻ ՆԵՐԴՐՄԱՆ

ԵՐԵՎԱՆ, 2022

ԲՈՎԱՆԴԱԿՈՒԹՅՈՒՆ

1. Ներածություն	3
2. Գնահատման համակարգի նպատակները և խնդիրները.....	4
3. Հիմնական հասկացությունները.....	4
4. Գնահատման առարկան և ծածկույթը	5
5. Գնահատման հիմնական տեսակները և փուլերը	6
6. Համակարգի ինստիտուցիոնալ կառուցվածքը և կառավարումը.....	10
7. Գնահատման խորհրդի և գնահատման հանձնաժողովի կազմն ու լիազորությունները.....	11
8. Գնահատման մեթոդաբանությունը.....	12
9. Արդյունքների օգտագործումը.....	13
10. Համակարգի ներդրման ժամանակացույցը և գնահատման հաճախականությունը...13	
11. Գնահատման փորձարկումը, մեթոդաբանական շտկումներ և կանոնավոր գործընթացների ներդրում.....	13

1. Ներածություն

1. Բյուջետային ծրագրի գնահատումը ենթադրում է ծրագրի վերաբերյալ տեղեկատվության ստացման, վերլուծության և օգտագործման համակարգված եղանակ, որի նպատակն է պատասխանել ծրագրի համապատասխանության, նպատակների հասանելիության, արդյունավետության, ազդեցության և արդյունքների կայունության վերաբերյալ հարցադրումներին:

2. Հայաստանում բյուջետային ծրագրերի գնահատման միասնական պետական համակարգի ներդրումն այսօր կարևոր և արդիական խնդիր է: Այն մեծ օգուտներ կբերի ռեսուրսների օգտագործման, կառավարության գործունեության արդյունավետության բարձրացման և հասարակության կարիքների բավարարման տեսանկյուններից: Բյուջետային ծրագրերի պարբերական և կանոնավոր գնահատման գործընթացի ներդրումը հիմքեր կստեղծի Ծրագրային բյուջետավորման (ԾԲ) բարեփոխումների շրջանակներում բյուջետային ծրագրերի վերանայման և ռազմավարական պլանավորման համակարգի ներդաշնակեցման գործընթացների առաջնդման համար:

3. Սկզբնական փուլում համակարգի բարձր արդյունավետության ապահովումը կպահանջի որոշակի ջանքեր և հետևողականություն: Այն մեզանում նոր մոտեցում է և պահանջում է համապատասխան վերլուծական կարողությունների ներդրում: Սակայն նոր համակարգը չպետք է հանգեցնի անօգուտ գործողությունների ավելացման կամ բյուրոկրատական բեռի ծանրացման: Ուստի նոր համակարգը պետք է նախագծված լինի այնպես, որ համապատասխանի առկա կարիքներին և լավագույն փորձին: Այս իմաստով կարևոր են՝

- 1) գործընթացների նպատակների և ներկայացվող պահանջների հստակությունը.
- 2) կազմակերպական և ինստիտուցիոնալ կառուցվածքի համարժեքությունը.
- 3) մեթոդաբանության հստակությունը.
- 4) արդյունքների որակը, անաչառությունը և հանրային վստահելիության աստիճանը.
- 5) արդյունքների գործնական օգտագործման և կիրառելիության հանգամանքները.
- 6) բյուջետային գործընթացներում ինտեգրման աստիճանը.
- 7) կայունության և արդյունավետության երաշխիքները:

2. Գնահատման համակարգի նպատակները և խնդիրները

4. Պետական բյուջետային ծրագրերի գնահատման համակարգի նպատակն է ինստիտուցիոնալ և օբյեկտիվ հիմքեր ստեղծել Հայաստանում իրականացվող և իրականացվելիք բյուջետային ծրագրերի արդյունավետության շարունակական բարձրացման համար: Մասնավորապես՝ համակարգի խնդիրներն են աջակցել և նպաստել՝

- 1) բյուջետային միջոցների բաշխման արդյունավետությանը և վերահսկողությանը.
- 2) բյուջետային ծրագրերի, դրանց կառուցվածքի, կատարողական ցուցանիշների և նպատակադրումների բարելավմանը.
- 3) առանձին գերատեսչությունների և նախարարությունների գործունեության և կատարողականի գնահատմանը.
- 4) պետական քաղաքանությունների և զարգացման ռազմավարությունների իրականացմանը.
- 5) հանրային իրազեկվածության, կառավարության թափանցիկության և հաշվետվողականության աճին:

5. Պետական բյուջետային ծրագրերի գնահատման համակարգը ինքնուրույն գործող, անկախ նոր համակարգ է, որը հանդիսանալով հանրային ֆինանսների կառավարման համակարգի ինտեգրալ բաղկացուցիչը, թույլ է տալու որոշակի պարբերականությամբ հետևել համակարգին, տալ ազդակներ և նախանշել որոշումներ, որոնք օբյեկտիվ են, ամբողջական և անաչառ, բխում են տարբեր շահառուների տեսակետների բազմակողմ վերլուծությունից:

3. Հիմնական հասկացությունները

6. **Գնահատում՝** սկսվող, ընթացող կամ ավարտված բյուջետային ծրագրի, միջոցառման կամ քաղաքականության կառուցվածքի կարևորության, իրականացման ընթացքի և արդյունքների համակարգային, անկողմնակալ ուսումնասիրություն-գնահատում: Ուղղված է որոշելու ծրագրի համապատասխանությունը և նպատակների իրագործման աստիճանը, իրականացման արդյունավետությունը, ազդեցությունը և արդյունքների կայունությունը: Պետք է ապահովի վստահելի և օգտակար տեղեկատվություն, հնարավորություն տա դասեր քաղելու և բարելավելու որոշումները:

7. **Գնահատման խորհուրդ՝** ՀՀ վարչապետի կողմից ձևավորված խորհուրդ, որը կայացնում է բյուջետային ծրագրերի գնահատումների հետ կապված հիմնական որոշումները՝ գնահատման պլանի հաստատում, գնահատման հանձնաժողովի անդամների ձևավորում, արդյունքների օգտագործում և հանրայնացում:

8. **Գնահատման հանձնաժողով՝** գնահատման խորհրդի կողմից ստեղծված հանձնաժողով, որը կազմվում է առանձին ծրագրերի և միջոցառումների գնահատման նպատակով և իր մեջ ներառում է ծրագիրն իրականացնող մարմնի, ԱԺ ոլորտային հանձնաժողովների, քաղաքացիական հասարակության և մասնագիտացած կառույցների ներկայացուցիչների: Գնահատման հանձնաժողովը իրականացնում է գնահատման ենթակա կոնկրետ ծրագրերի

ընտրությանը մասնակցություն, գնահատման տեխնիկական առաջադրանքի հաստատում, գնահատման արդյունքների և որակի քննություն, շահագրգիռ կողմերի և գործընկերների հետ համագործակցություն:

9. **Գնահատման կազմակերպիչ կամ քարտուղարություն՝** ՀՀ ՖՆ-ի կամ ՀՀ վարչապետի աշխատակազմի համապատասխան ստորաբաժանում, որը կազմակերպում է գնահատման գործընթացը, մշակում է տեխնիկական առաջադրանքները, նախագծում է գնահատման տարեկան ժամանակացույցերը, անհրաժեշտության դեպքում իրականացնում է նախնական գնահատումներ-վերլուծություններ:

10. **Գնահատող՝** սահմանված մեթոդաբանությամբ ծրագրի գնահատումն իրականացնող ՀՀ ՖՆ-ի՝ համապատասխան փորձառություն ունեցող մասնագիտացված աշխատանքային խումբ, ստորաբաժանում կամ խորհրդատվական և հետազոտական կազմակերպություններ, որոշ գնահատումների դեպքերում (երբ վիճակագրական հարցումներ և տեղեկատվության հավաքագրման բարդ համակարգերի անհրաժեշտությունը բացակայում է)՝ նաև համապատասխան որակավորում ունեցող փորձագետներ:

11. **Գնահատման հաշվետվություն՝** գնահատողի կողմից մշակված, սույն փաստաթղթով սահմանված մեթոդաբանական պահանջներին համապատասխան գնահատման արդյունքները և առաջարկները ներկայացնող հաշվետվություն:

12. **Ճյուղային մարմնի արձագանք՝** գնահատման արդյունքների և գնահատողի կողմից ներկայացված առաջարկությունների վերաբերյալ ճյուղային գլխադաս մարմնի արձագանք, որով պետական մարմինը հաստատում կամ մերժում է գնահատողի կողմից կատարված բարելավումների առաջարկությունները, ներկայացնում ծրագրի բարելավմանն ուղղված գործողությունների իր մոտեցումը:

13. **Գնահատման չափանիշներ՝** ծրագրի բովանդակության, գործընթացների արդյունավետության, սպասվող ազդեցությունների սահմանումները և (կամ) ստանդարտներն են: Ներառում են ծրագրի բովանդակային այն ուղղությունները, որոնք գնահատման գործընթացում ենթակա են քննության:

14. **Ծրագրի գնահատականներ՝** ըստ առանձին գնահատման չափանիշների՝ գնահատման արդյունքում ծրագրի վաստակած գումարային միավոր, գնահատական:

4. Գնահատման առարկան և ծածկույթը

15. Ընդհանուր առմամբ՝ բոլոր պետական բյուջետային ծրագրերը և առանձին միջոցառումները հանդիսանում են գնահատման առարկա:

16. Գնահատման ենթակա բյուջետային ծրագրերն ընտրվում են որոշակի պարբերականությամբ՝ ելնելով որոշակի առաջնահերթություններից, մշակվում են գնահատման ժամանակացույցեր՝ տարեկան պլաններ:

17. Գնահատման տարեկան պլանը մշակվում է՝ հաշվի առնելով ոլորտում իրականացված տարբեր ներքին և արտաքին վերահսկողական գործողությունների արդյունքում ներկայացված եզրակացությունները, նախորդ տարիների գնահատման արդյունքները՝ առաջնահերթ համարելով ստորև ներկայացված մարմինների կողմից բյուջետային ծրագրերի հաշվեքննության, աուդիտի, այլ վերահսկողական գործողությունների արդյունքում ձևավորված պահանջները:

- 1) ՀՀ հաշվեքննիչ պալատ.
- 2) ՀՀ պետական վերահսկողական ծառայություն.
- 3) ՀՀ ՖՆ-ի ֆինանսաբյուջետային վերահսկողության վարչություն.
- 4) ԱԺ ոլորտային հանձնաժողովներ.
- 5) քաղաքացիական հասարակություն և այլ մասնակցային ինստիտուտներ:

18. Տարեկան պլանն անհրաժեշտության դեպքում կարող է տարվա ընթացքում վերանայվել և համալրվել նոր ծրագրերով:

19. Գնահատման պլանում կարող են ընդգրկվել՝

- 1) բոլոր տեսակի և բնույթի պետական բյուջետային ծրագրերը կամ միջոցառումները.
- 2) նոր նախաձեռնությունները և գործող ծրագրերը.
- 3) պետական բյուջեի բոլոր ծրագրերը՝ անկախ ֆինանսավորման աղբյուրից:

20. Գնահատման նշված համակարգի ներդրմամբ և գնահատման ստացված արդյունքների օգտագործմամբ հնարավոր կլինի նաև զուգահեռաբար իրականացնել գնահատված բյուջետային ծրագրերի համեմատական վարկանշում: Թեև դա համակարգի հիմնական նպատակը չէ, սակայն նման նոր վարկանիշները թույլ կտան արդեն պատասխանատու գերատեսչության շրջանակներում համեմատել, դասակարգել ծրագրերի և կատարված աշխատանքների արդյունքները՝ ծրագրի կատարման վերաբերյալ ձևավորել փաստարկված հանրային կարծիք:

5. Գնահատման հիմնական տեսակները և փուլերը

21. Բյուջետային ծրագրերի գնահատումները կարող են իրականացվել տարբեր փուլերում և ամբողջականության տարբեր աստիճաններով: Ընդհանուր առմամբ առանձնացնում ենք՝

- 1) սկզբնական (նախնական) գնահատում.
- 2) ընթացիկ (միջանկյալ) գնահատում.
- 3) վերջնական գնահատում:

22. Ի լրումն՝ ծրագրի գնահատումները բովանդակային իմաստով կարելի է դասակարգել երեք հիմնական տեսակների՝

- 1) նպատակների գնահատումներ.
- 2) գործընթացների գնահատումներ և
- 3) ազդեցության գնահատումներ:

23. Ի վերջո, գնահատման առարկա կարող են հանդիսանալ՝

- 1) նոր նախաձեռնությունները.
- 2) ընթացիկ ծրագրերը և
- 3) ավարտված ծրագրերը:

24. Սկզբնական (նախնական) գնահատում. այս գնահատումներն ըստ էության նպատակ ունեն առավել օպերատիվ կերպով տեղեկատվություն ստանալու՝ նոր նախաձեռնությունների վերաբերյալ: Դրանք առավել արագ և օպերատիվ բնույթ ունեն և բյուջետային հայտերի քննության փուլում լրացուցիչ տեղեկությունների ստացման աղբյուր

են: Սովորաբար իրականացվում են բյուջետային հայտերի քննության փուլում, ՀՀ ՖՆ-ի կողմից:

25. Որպես կանոն, կարող են ներառել նպատակների գնահատումներ, որոշ դեպքերում՝ նաև գործընթացների վերլուծություն: Օգտակար են օպերատիվ, տարեկան կտրվածքով որոշումների կայացման և բյուջետային հայտերի քննության փուլում:

26. Ընթացիկ (միջանկյալ) գնահատում. այս գործողությունները վերաբերում են ընթացիկ կամ շարունակական իրականացվող ծրագրերին՝ պարզելու համար դրանց ազդեցության և բարելավման հնարավորությունները: Ընթացիկ գնահատումների համար հիմք կարող են հանդիսանալ ծրագրի իրականացման ընթացքում ծագած ռիսկերը, ընթացիկ մոնիտորինգի արդյունքները և այլն:

27. Վերջնական գնահատում. այս գործողությունները վերաբերում են արդեն ավարտված կամ ենթադրյալ վերջնարդյունքներին հասած ծրագրերի ավարտական (ex-post) գնահատմանը:

28. Ընդ որում՝ որևէ ծրագիր կարող է ենթարկվել ինչպես նախնական, այնպես էլ միջանկյալ և հետագայում նաև՝ վերջնական գնահատման:

29. Հաշվի առնելով ծրագրերի առանձնահատկությունները և ելնելով գնահատման հիմնական խնդրից՝ յուրաքանչյուր ծրագրի գնահատման համար պահանջվում է մշակել համապատասխան մեթոդաբանական շրջանակ և հատուկ տեխնիկական առաջադրանք:

30. Ծրագրի գնահատումներն ըստ հիմնական տեսակների.

1) **Նպատակների գնահատումներ.** նպատակների վրա հիմնված գնահատումների դեպքում գնահատվում է ծրագրի առջև դրված նպատակների հատկությունը, համապատասխանությունը և դրանց ձեռքբերման առաջընթացը: Սրանք հաճախ կարող են վերաբերել բյուջետային հայտերի քննության փուլին, որի դեպքում պետք է պատասխան ստանան հետևյալ հիմնական հարցադրումները.

ա. Ինչպե՞ս են սահմանված ծրագրի նպատակը և վերջնական արդյունքները, արդյո՞ք դրանք հստակ և պատշաճ կերպով են սահմանված: Արդյո՞ք գործընթացներն արդյունավետ են և բխում են նպատակից,

բ. Արդյո՞ք ծրագրի շրջանակում իրականացվող միջոցառումները, գործողությունները և ուղղակի արդյունքները միտված են նպատակներին կամ վերջնական արդյունքներին,

գ. Առկա՞ են արդյոք լավ ձևակերպված արդյունքային ցուցանիշներ՝ ծրագրի նպատակներին հասնելու առաջընթացը գնահատելու համար,

դ. Ինչպիսի՞ն է ծրագրի առաջընթացը՝ նպատակներին հասնելու իմաստով,

ե. Արդյո՞ք հնարավոր է հասնել սահմանված նպատակին սահմանված ժամկետներում, եթե՞ ոչ, ապա՝ ինչու,

զ. Արդյո՞ք անձնակազմն ունի անհրաժեշտ ռեսուրսներ (գումար, սարքավորումներ, տարածք, կարողություններ և այլն)՝ նպատակին հասնելու համար,

է. Արդյո՞ք կարիք կա փոխելու ծրագրի կառուցվածքը՝ նպատակների վրա կենտրոնացման համար,

ը. Արդյո՞ք պետք է վերանայել նպատակը և ինչու.

2) Գնահատման այս տեսակը կարող է իրականացվել նաև ծրագրի իրականացման ընթացքում՝ միջանկյալ գնահատման, ինչպես նաև ծրագրերի ավարտից հետո՝ վերջնական գնահատման ընթացքում: Վաղ փուլերում միջանկյալ գնահատումները կարող են ապահովել օգտակար հետադարձ տեղեկատվություն՝ ծրագրի կառուցվածքի (դիզայնի) վերաբերյալ, ինչպես նաև զգուշացնել նպատակների ձևակերպման հստակության, ռեսուրսների, միջոցառումների և նպատակների միջև հնարավոր անհամապատասխանությունների մասին: Այն կարող է հիմք հանդիսանալ ծրագրերի առաջընթացի, հնարավոր վերանայումների և, ավարտված ծրագրերի դեպքում՝ եզրափակիչ դիտարկումների և քաղաքականությունների գնահատման համար:

3) **Գործընթացների գնահատումներ.** Գործընթացներն ուղղված են հասկանալու, թե ինչպես են փաստացի իրականացվում ծրագրային գործողությունները և թե արդյոք ծրագրի իրականացման գործընթացներն արդյունավետ են: Մասնավորապես, կարող են հասցեագրվել հետևյալ հարցադրումները.

ա. Արդյո՞ք իրականացվում են պատշաճ ընթացակարգեր՝ որակյալ ծառայությունների ժամանակին մատուցման համար,

բ. Արդո՞ք առկա են համապատասխան միջոցներ (գումար, սարքավորումներ, տարածք, կարողություններ և այլն)՝ ծառայությունների ժամանակին տրամադրումն ապահովելու համար,

գ. Արդո՞ք առկա են համապատասխան համակարգեր (մարդկային ռեսուրսներ, ֆինանսական, կառավարման տեղեկատվություն և այլն)՝ ծրագրի իրականացմանն օժանդակելու համար,

դ. Արդյո՞ք ծրագրի շահառուներն ստանում են որակյալ ապրանքներ և ծառայություններ,

ե. Արդյո՞ք ծրագրի շահառուները բավարարված են մատուցվող ծառայություններից,

զ. Առկա՞ են ծրագրի իրականացման ռիսկեր և խնդիրներ,

է. Արդյո՞ք ծրագրի հասցեական իրականացումն ապահովված է,

ը. Ծրագրի իրականացման այլընտրանքային ուղիների առկայության դեպքում ո՞րն է ամենաարդյունավետը,

թ. Իրականացվո՞ւմ են և առկա են արդյո՞ք ծրագրի իրագեկման համապատասխան գործողություններ՝ թիրախային բնակչության ընդգրկման ցանկալի մակարդակ ապահովելու համար:

4) **Ազդեցության գնահատումներ.** ազդեցության գնահատումներն իրականացվում են հասկանալու համար, թե արդյոք ծրագիրն ապահովել է նախատեսված վերջնական արդյունքները՝ թիրախավորված շահառու խմբերին համապատասխան և որակյալ ուղղակի արդյունքներ և ծառայություններ մատուցելու միջոցով: Վերջնական արդյունքները սովորաբար վերաբերում են ծրագրի շահառուների կյանքի բարելավումներին և բարեկեցության աճին: Ազդեցության գնահատման ժամանակ պետք է պատասխան ստանան հետևյալ հիմնական հարցադրումները.

ա. Արդյո՞ք ծրագիրը կամ քաղաքականությունն ունի թիրախավորված ազդեցություններ շահառուների վրա,

- բ. Արդյո՞ք գրանցված փոփոխությունները վերագրելի են ծրագրին, թե՞ դրանք անկախ են տվյալ ծրագրի իրականացումից,
- գ. Առկա՞ են արդյոք չնախատեսված դրական կամ բացասական ազդեցություններ շահառուների համար,
- ե. Արդյո՞ք ծրագրի ծախսերը հիմնավորված են արձանագրված ազդեցությունների համեմատ.

5) Ազդեցության գնահատման արդյունքները ծրագրի ծախսերի վերլուծության հետ միասին լրացուցիչ գնահատման գործիք են ապահովում ծախսերի արդյունավետության վերլուծությունների համար և թույլ են տալիս քաղաքականություն մշակողներին տեղեկացված որոշումներ կայացնել և ռեսուրսներն ուղղել առավել արդյունավետ միջամտություններին.

6) Ելնելով տվյալ ծրագրի գնահատման խնդրից՝ միջանկյալ և վերջնական գնահատումները կարող են ներառել թե՛ նպատակների, թե՛ գործընթացների և թե՛ ազդեցությունների գնահատումներ:

Գնահատման հիմնական տեսակների ամփոփագիր

	Նպատակների գնահատումներ	Գործընթացների գնահատումներ	Ազդեցության գնահատումներ
Հիմնական հարցադրումները	<ul style="list-style-type: none"> • Արդյո՞ք քաղաքականությունները կամ ծրագրերն ունեն հստակ նպատակներ: • Արդյո՞ք ծրագրի ձևակերպումն այնպիսին է, որ թույլ է տալիս հասնել նպատակներին: • Որքանո՞վ են իրագործվել ծրագրի նպատակները: 	<ul style="list-style-type: none"> • Որո՞նք են ծառայության մատուցման համար իրականացվող գործողությունները: Որքանո՞վ են դրանք համապատասխանում արդյունքների ձեռքբերմանը: • Արդյո՞ք այդ գործողություններն արդյունավետ են: • Արդյո՞ք ներդրվել են համապատասխան ռեսուրսներ և համակարգեր: • Արդյո՞ք ծրագրի մասնակիցներն ստանում են որակյալ և ցանկալի ծառայություններ: 	<ul style="list-style-type: none"> • Ինչպես է փոփոխվել շահառուների բարեկեցությունը ծրագրի իրականացման արդյունքում: • Կա՞ն արդյոք չնախատեսված ազդեցություններ՝ դրական կամ բացասական: • Արդյո՞ք ծրագրի իրականացման ծախսերը հիմնավորված են ազդեցությունների համեմատ:
Գնահատման իրականացման ժամանակը	<ul style="list-style-type: none"> • Կարող է իրականացվել ծրագրի իրականացման վաղ փուլերում՝ միջնաժամկետ վերանայման համար, կամ ծրագրի ավարտին: 	<ul style="list-style-type: none"> • Կարող է իրականացվել ցանկացած ժամանակ մեկ անգամ կամ պարբերաբար՝ համոզվելու համար, որ իրականացումը ճիշտ ընթացքում է, կամ որ առկա են կոնկրետ գործառնական խնդիրներ: 	<ul style="list-style-type: none"> • Հատկապես արդյունավետ են քաղաքականության հարցադրումներին արձագանքելու, կամ նորարարական և պիլոտային մոտեցումները ստուգելու համար:
Տվյալների հավաքման և վերլուծության մեթոդները	<ul style="list-style-type: none"> • Փաստաթղթային ուսումնասիրություններ • Մոնիտորինգային տվյալների վերլուծություն • Հարցումներ • Դաշտային այցեր 	<ul style="list-style-type: none"> • Ծրագրի անձնակազմի և շահառուների հետ խառը հարցազրույցներ • Առկա գրառումների ուսումնասիրություններ • Ֆոկուս խմբային քննարկումներ 	<ul style="list-style-type: none"> • Ընտրանքային հետազոտությունների և վարչական տվյալների վիճակագրական և էկոնոմետրիկ վերլուծություններ

		<ul style="list-style-type: none"> • Մոնիտորինգի տվյալների վերլուծություն 	<ul style="list-style-type: none"> • Որակական հետազոտությունների համադրում
Պահանջվող հմտությունները	<ul style="list-style-type: none"> • Քաղաքականության և ծրագրերի վերլուծություններ, պարզ քանակական մեթոդներ 	<ul style="list-style-type: none"> • Գործընթացների վերլուծություններ, քանակական և որակական մեթոդներ 	<ul style="list-style-type: none"> • Վիճակագրական և էկոնոմետրիկ վերլուծություններ, որակական մեթոդներ
Պահանջվող Ժամանակը	<ul style="list-style-type: none"> • 1-3 ամիս 	<ul style="list-style-type: none"> • 1-6 ամիս 	<ul style="list-style-type: none"> • Առնվազն 6 ամիս (ռեպրոսպեկտիվ գնահատում) • Առնվազն 12-18 ամիս (հեռանկարային գնահատում)
Ծախսերի գնահատականը	<ul style="list-style-type: none"> • Հիմնականում ցածր 	<ul style="list-style-type: none"> • Ցածր-միջին 	<ul style="list-style-type: none"> • Միջինից բարձր

6. Համակարգի ինստիտուցիոնալ կառուցվածքը և կառավարումը

31. Պետական բյուջետային ծրագրերի գնահատման համակարգերը տարբերվում են իրենց բնույթով և ուղղվածությամբ: Նախ դրանք տարբերվում են ըստ արդյունքների օգտագործման, որոնք կարող են ունենալ ընդհանուր խորհրդատվական բնույթ կամ, մեկ այլ դեպքում՝ կիրառման համար լինեն պարտադիր: Ինստիտուցիոնալ կազմակերպչական իմաստով գնահատման պետական մարմինները կարող են տարբերվել անկախ արտաքին միավորներից՝ մինչև բյուջետային լիազոր մարմնի ներքո գործող խիստ կենտրոնացված միավորներ կամ խիստ ապակենտրոնացված միավորներ:

32. Ելնելով սահմանված խնդիրներից և պահանջներից, հիմք ընդունելով նաև միջազգային փորձը և տեղային առանձնահատկությունների, ինչպես նաև նոր ենթակառուցվածքների և ինստիտուտների ձևավորման ռեսուրսային սահմանափակումները՝ ՀՀ պետական բյուջետային ծրագրերի գնահատման համակարգի հիմքում ընտրվել է «կենտրոնացված մոդելը»՝ ՀՀ վարչապետի անմիջական հսկողության ներքո:

33. Սա ենթադրում է, որ՝

- 1) գնահատման հիմնական գործառնություններն իրականացվում են ՀՀ ՖՆ-ի կամ ՀՀ վարչապետի աշխատակազմի, իսկ ղեկավարումը՝ ՀՀ վարչապետի կողմից՝ ծրագրերի գնահատման խորհրդի միջոցով.
- 2) գնահատման համակարգի առօրյա կառավարումը, տեխնիկական առաջադրանքների մշակումը և մրցույթների կազմակերպումը, ինչպես նաև արդյունքների օգտագործումն իրականացնում է ՀՀ ՖՆ-ն կամ ՀՀ վարչապետի աշխատակազմի համապատասխան ստորաբաժանումը.
- 3) գնահատման աշխատանքների ֆինանսավորումն իրականացվում է ՀՀ պետական բյուջեի, միջազգային դոնոր կազմակերպությունների և օրենքով չարգելված այլ աղբյուրների հաշվին.
- 4) գնահատման աշխատանքներն իրականացվում են ՀՀ ՖՆ-ի համապատասխան փորձառություն ունեցող աշխատողների, ստորաբաժանման, անհրաժեշտության դեպքում նաև խորհրդատվական և ակադեմիական կազմակերպությունների, որոշ

գնահատումների դեպքերում (երբ վիճակագրական հարցումներ և տեղեկատվության հավաքագրման բարդ համակարգերի անհրաժեշտությունը բացակայում է)՝ նաև համապատասխան որակավորում ունեցող փորձագետների կողմից.

- 5) գնահատման վերջնական արդյունքներն ամփոփվում են ՀՀ ֆինանսների նախարարությունում կամ ՀՀ վարչապետի աշխատակազմում:

7. Գնահատման խորհրդի և գնահատման հանձնաժողովի կազմն ու լիազորությունները

34. **Գնահատման խորհուրդը** ձևավորվում է ՀՀ վարչապետի որոշմամբ՝ հետևյալ կազմով.

- 1) տնտեսական ոլորտի համակարգումն իրականացնող ՀՀ փոխվարչապետ (խորհրդի նախագահ).
- 2) ՀՀ վարչապետի աշխատակազմի ղեկավարի տեղակալ.
- 3) ՀՀ ֆինանսների նախարար (փոխնախարար):

35. **Գնահատման հանձնաժողովը** ձևավորվում է գնահատման խորհրդի կողմից՝ հետևյալ կազմով.

- 1) ՀՀ ֆինանսների նախարարության ներկայացուցիչներ՝ մշտական անդամներ.
- 2) համապատասխան ճյուղային նախարարության ներկայացուցիչ՝ ժամանակավոր անդամ.
- 3) համապատասխան ՀՀ ԱԺ ոլորտային հանձնաժողովի ներկայացուցիչ՝ ժամանակավոր անդամ.
- 4) անկախ անդամներ, որոնք կներկայացնեն ակադեմիական, փորձագիտական հանրությունը և (կամ) քաղաքացիական հասարակությունը՝ մշտական անդամներ:

36. Անկախ անդամների մասնակցությունը հանձնաժողովի աշխատանքներում պետք է համարվի սկզբունքային:

37. Խորհուրդը գումարվում է ըստ անհրաժեշտության, սակայն տարեկան առնվազն 3 անգամ: Որոշումները կայացվում են ձայների պարզ մեծամասնությամբ: Որոշումները համարվում են իրավաչափ, եթե դրան մասնակցել են անկախ անդամներից առնվազն 2-ը:

38. Գնահատման խորհրդի հիմնական գործառույթներն են՝

- 1) ձևավորել գնահատման հանձնաժողովի անդամների կազմը.
- 2) հաստատել գնահատման տարեկան պլանը.
- 3) հաստատել գնահատման տեխնիկական առաջադրանքները և մրցութային հրավերների տեխնիկական պայմանները.
- 4) հաստատել գնահատման հաշվետվության և գնահատման գործընթացների համապատասխանության արդյունքները.
- 5) հանրայնացնել գնահատման արդյունքները.
- 6) գնահատման գործընթացի արդյունքում կայացնել համապատասխան որոշումներ:

39. Գնահատման հանձնաժողովի հիմնական գործառույթներն են՝

- 1) հաստատել գնահատման տարեկան պլանի նախագիծը ներկայացնել գնահատման խորհրդի հաստատմանը.
- 2) սահմանել գնահատման ենթակա կոնկրետ ծրագրերի գնահատման իրականացման ժամկետները.

- 3) քննել գնահատման քարտուղարության կողմից ներկայացված գնահատման տեխնիկական առաջադրանքները և ներկայացնել գնահատման խորհրդի հաստատմանը.
 - 4) հաստատել գնահատման մրցույթների արդյունքները.
 - 5) հաստատել կոնկրետ ծրագրերի գնահատման համար ներկայացված մեթոդաբանությունները.
 - 6) իրականացնել գնահատման արդյունքների և որակի քննություն (համաձայն N 1 հավելվածում ներկայացվող ստուգաթերթի).
 - 7) ապահովել շահագրգիռ կողմերի և գործընկերների հետ համագործակցություն:
40. Միջազգային զարգացման գործակալությունների և (կամ) առանձին դոնորների կամ այլ կերպ համագործակցաբար իրականացվող ծրագրերի դեպքում տվյալ մարմինների ներկայացուցիչները կարող են խորհրդակցական ձայնի իրավունքով ընդգրկվել գնահատման հանձնաժողովում:

8. Գնահատման մեթոդաբանությունը

41. Բյուջետային ծրագրերի գնահատումն իրականացվում է «Բյուջետային ծրագրերի գնահատման մեթոդական ուղեցույցի» հիման վրա, որը հաստատվում է ՀՀ ՖՆ-ի կողմից:

42. Յուրաքանչյուր բյուջետային ծրագրի գնահատման դեպքում նախապես մշակվում է համապատասխան տեխնիկական առաջադրանք, որում առաջնորդվելով վերոնշյալ ուղեցույցով՝ ներկայացվում են տվյալ ծրագրի համար համապատասխանեցված մեթոդական շրջանակ և պահանջներ:

43. Ընդհանուր առմամբ, գնահատման համար հիմք պետք է ծառայեն լայնորեն կիրառվող գնահատման հետևյալ 5 ստանդարտ չափանիշները՝

- 1) համապատասխանություն.
- 2) նպատակների հասանելիություն.
- 3) արդյունավետություն.
- 4) ազդեցություն.
- 5) արդյունքների կայունություն:

44. Ի լրումն հիմնական այս չափանիշների՝ կարող են կիրառվել նաև լրացուցիչ չափանիշներ և չափորոշիչներ (միջոլորտային կամ խաչվող)՝ այլ ազդեցությունների գնահատման և վերլուծության համար:

45. Գնահատման վերջնական մեթոդաբանությունը մշակվում է գնահատողի կողմից, որը ենթակա է համաձայնեցման գնահատման հանձնաժողովի կողմից:

46. Ծրագրի գնահատման ընթացքում գնահատողը պետք է համապատասխան տեղեկատվական և կազմակերպական աջակցություն ստանա ծրագրի պատասխանատու և (կամ) իրականացնող պետական մարմնի(ների) կողմից:

47. Գնահատողը պարտավոր է չհրապարակել և չտրամադրել գործունեության ընթացքում կամ արդյունքում իրեն հայտնի դարձած տեղեկությունները՝ բացառությամբ օրենսդրությամբ նախատեսված դեպքերի:

9. Արդյունքների օգտագործումը

48. Գնահատման հանձնաժողովի կողմից գնահատման հաշվետվության հաստատումից հետո ուղարկում է տվյալ բյուջետային ծրագրի (միջոցառման) պատասխանատու պետական մարմին՝ գնահատման արդյունքների արձագանք ստանալու նպատակով: Այդ նպատակով տվյալ մարմինը ներկայացնում է գնահատման արդյունքների վերաբերյալ պետական մարմնի արձագանքի ամփոփաթերթը (հավելված N 2):

49. ՀՀ ՖՆ-ն, հաշվի առնելով ըստ առանձին չափանիշների գնահատումների արդյունքները, գնահատման համապատասխանության արդյունքները և պետական մարմնի արձագանքը, կարող է իրականացնել ծրագրի ամփոփ գնահատականների հաշվարկ՝ ըստ գնահատման սահմանված չափանիշների, և ծրագրի վարկանշում:

50. Ծրագրի գնահատման փաթեթը, այն է՝ գնահատման հաշվետվությունը, գնահատման գործընթացի և հաշվետվության համապատասխանության ստուգաթերթը և գնահատման արդյունքների վերաբերյալ պետական մարմինների արձագանքի ամփոփաթերթը, համապատասխան ուղեկցող գրությամբ և անհրաժեշտ մեկնաբանություններով և առաջարկներով ներկայացվում է ՀՀ վարչապետին, համապատասխան գերատեսչություններին և ՀՀ ԱԺ, ինչպես նաև դառնում է հասանելի ՀՀ ՖՆ-ի կայքում: Դրանք հիմք են ծառայում համապատասխան որոշումների կայացման համար:

10. Համակարգի ներդրման ժամանակացույցը և գնահատման հաճախականությունը

51. Գնահատման համակարգի ներդրման առաջին փուլով (2024-2028 թթ.) սկզբնական՝ նախնական գնահատում կանցնեն բոլոր նոր նախաձեռնությունները, ընթացիկ ծրագրերը կգնահատվեն ըստ անհրաժեշտության, արդյունավետության և ազդեցության գնահատում կանցնեն բոլոր ավարտվող ծրագրերը:

52. 2029 թվականից պետական բյուջետային բոլոր ծրագրերի համար գնահատման գործընթացը կդառնա պարտադիր: Հաջորդող տասը տարիների ընթացքում կգնահատվեն պետական բյուջեի բոլոր ծրագրերը:

53. Վարկային և գրանտային ծրագրերը կարող են գնահատման չենթարկվել՝ հաշվի առնելով այն հանգամանքը, որ դրանք կառույցների և պետական մարմինների պահանջով այդպիսի ծրագրերի իրականացման ընթացքում և ավարտից հետո սովորաբար ենթակա են պարտադիր գնահատումների:

54. Այլ հավասար պայմաններում, այսինքն՝ վերոնշյալ մարմինների կողմից այս ծրագրերի գնահատման պահանջի առկայության դեպքում, դրանք ևս ենթակա են գնահատման:

11. Գնահատման փորձարկումը, մեթոդաբանական շտկումներ և կանոնավոր գործընթացների ներդրում

55. Գնահատման համակարգի և գնահատման մեթոդաբանության նախագծի փորձարկման, հնարավոր թերությունների բացահայտման և հետագա կատարելագործման նպատակով՝ ՀՀ ՖՆ-ի կողմից կիրականացվեն առնվազն 3 բյուջետային ծրագրերի պիլոտային գնահատումներ:

56. Գնահատման ենթակա բյուջետային ծրագրերը կընտրվեն տարբեր ոլորտներից, չեն կրկնվի կառուցվածքի և բովանդակության առումով, կտարբերվեն ֆինանսավորման ծավալներով և այլ պարամետրերով:

57. Բյուջետային ծրագրերի պիլոտային գնահատումների արդյունքները հիմք կհանդիսանան գնահատման մեթոդաբանության նախագծի վերանայման և անհրաժեշտության դեպքում առանձին ծրագրերի առանձնահատկությունների սահմանման համար:

Բյուջետային ծրագրերի պատասխանատու պետական մարմիններում ծրագրերի գնահատման գործընթացի ներդրման ժամանակացույց

	Միջոցառումներ	Ժամկետներ
1.	Բյուջետային ծրագրերի գնահատման մեթոդաբանության մշակում	2022 թ. մարտի 3-րդ տասնօրյակ
2.	Ընտրված առնվազն 3 բյուջետային ծրագրերի պիլոտային գնահատումների իրականացում	2022 թ. նոյեմբերի 3-րդ տասնօրյակ
3.	Գնահատման մեթոդաբանության նախագծի վերանայում և ճշգրտումներ, ծրագրերի բացահայտված առանձնահատկությունների ինտեգրում	2022 թ. հոկտեմբեր - դեկտեմբեր
4.	Բյուջետային ծրագրերի գնահատման պատասխանատու ստորաբաժանումը համալրված է, մասնագետները վերապատրաստված են և ունեն համապատասխան կարողություններ: Գնահատման ընթացակարգերն առկա են:	2023 թ. հունվար – դեկտեմբեր

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՎԱՐՉԱՊԵՏԻ ԱՇԽԱՏԱԿԱԶՄԻ
ՂԵԿԱՎԱՐ**

Ա. ՀԱՐՈՒԹՅՈՒՆՅԱՆ